

*Ess. sur* [J. L. Guéz de Balzac]  
**HARANGUES**  
**PANEGYRIQUES.** (136)

AV ROY, 1673

*Sur l'ouverture de ses Etats.* 3217

ET A LA REINE,

*Sur l'heureux succès de sa Regence.*



A PARIS,

Chez TOUSSAINCT DU BRAY, rue S. Jacques,  
aux Espics meurs, & en sa boutique au  
Palais, en la gallerie des Prisonniers.

---


M. D. C. XV.

*Avec Privilege du Roy.*

1673  
co. 2

---

*Extraict du Priuilege du Roy.*

 A R grace & Priuilege du Roy, il est permis à TOUSSAINCT DV BRAY, Marchand Libraire luré a Paris, d'imprimer ou faire Imprimer, vendre & distribuer, deux Harangues Panegyriques, composées par le Sr. de Balzac, l'une au Roy sur l'ouuerture de ses Estats, & l'autre à la Roynie, sur l'heureux succez de sa Regence, Et deffences sont faictes a tous autres Libraires & Imprimeurs de ce Royaume, de les Imprimer ou faire Imprimer, vendre & distribuer, sans le congé & consentement dudit du Bray, pendant le temps & terme de six ans, entiers & accomplis, sur peine de confiscation des Impressions qui en seront trouuées, & d'amande arbitraire enuers ledit du Bray, & de tous ses despens dommages & intereests, ainsi que plus amplement est contenu & déclaré es lettres dudit Priuilege. Donné à Paris le troisieme Iour de Decembre, mil six cens quatorze.

Par le Conseil,

Signé,

ROVIAVL T.





H A R A N G V E  
P A N É G Y R I Q V E,  
A V R O Y.

*Sur l'ouverture de ses Estats.*



I R E,

L'Entrée de vostre  
Majorité ne pouuoit e-  
stre plus belle, ny se fai-  
re mieux à propos que par l'ouuer-  
ture de vos Estats : vous n'y pou-  
uies passer sur vne planche plus  
seure que celle-cy : vous ne pou-

A ij

uiés vous embarquer en vn meilleur vaisseau , ny vous mettre dans le Dedale des affaires publiques, sans auoir pris en ceste assemblée le filet d'Ariadne pour vous y conduire. Vn Prince ne peut finir mal, qui commence par la Iustice: comme en ceste action il approche plus de Dieu , il merite plus aussi des hommes qu'en tout' autre. Vos subjects, S I R E, vous recognoistront icy pour leur pere; vous les recognoistrés pour vos enfans. Vous sçaurés ceux à qui vous cōmandés , ils verront celuy à qui ils obeissent. Celuy qui commençant à viure , à commencé presqu'à regner , qui est nay dans la pourpre, & sur les fleurs de Lys: qui est Majeur à quatorze ans, y



en ayant eu de mineurs autrefois à quarante. Il est vray, SIRE, ce que les hommes appellent prudence, c'est vostre naturel, & Dieu vous donne, comme à son fils aîné, ce qu'il nous fait gagner, comme à ses esclaves. Vous exercez ses iugemens. Il nous fera tantost entendre ses volontés par vostre bouche, comme vn iour il les exécutera par vostre main. Il a permis le desordre, affin de vous donner le moyen de le reformer : il a laissé les maladies, affin que vous y appliquassies les remedes, il a voulu que les mauuaises coustumes prissent pied, affin que vous eussies l'honneur de remettre les bonnes, en fin le mal à esté iusques icy, pour vous donner seulement la loüange du

bien . Nous l'attendons tous ,  
S I R E, de vostre Royale bonté:  
Ce sont les vœux & les voix des  
trois ordres de vostre Royaume.  
Si vous aymés vostre Mere , vous  
affectionnerés particulièrement ce  
qui touche l'Eglise ; si vous vous  
aymés vous mesmes , vous ferés  
paroistre par reflexion vne estin-  
celle de cest amour à vostre No-  
blesse : Si vous aymez vos enfans ,  
il ne peut estre que vostre peuple  
ne s'en ressent. Tous trois, S I R E,  
vous recognoissants comme leur  
protecteur, l'Eglise, de sa dignité;  
la Noblesse, de son honneur ; & le  
peuple de son repos. C'est icy vo-  
stre grande feste , S I R E, vous de-  
uez exaucer nos prieres: Ce sont les  
grands Iours, ou il faut que chacun




reçoïue selon ses œuvres: Que toutes les grandeurs s'humilient à la vostre : Que tous les petits luminaires s'esuanoïïssent à la veuë de leur Soleil : Que le plus grand de vos subjects cognoisse qu'il n'est grand , qu'à cause qu'il est plus petit que vous: & que la qualité de premier Prince ne le doit pas tant releuer que celle de vostre premier seruiteur. C'est icy sur tout, SIRE, que vous deuez asscurer la tranquillité de vostre Estat , & establir le repos de vos subjects. Il faut qu'en ouurant ceste assemblée , vous fermiez à iamais le Temple de Ianus. La guerre est morte en vostre naissance: Il faut que vostre Majorité l'enseuelisse: Vostre berceau , SIRE , à esté celuy de la

paix : De sorte que si la France à de l'obligation à vos predecesseurs d'auoir long-temps esté au monde : Elle vous en a beaucoup d'y estre venu : Vous luy auez apporté le plus beau present que le Ciel puisse faire à la Terre : Ceste paix, dis-je, qui est creuë avecques vous : Qui conte aujourd'huy son aage avec le vostre : & ( si nous croyons aux Propheties ) qui doit, S I R E, ne mourir iamais , si vous vivez tousiours.

H A R A N G V E





# H A R A N G V E

## P A N E G Y R I Q V E,

A L A R E I N E.

*Sur l'heureux succès de sa Regence.*

A D A M E,

**M** Si ceux qui ont eu le maniement des affaires publiques, quelque sage conduite de laquelle ils ayent vſé, ont tousiours eu des plaintes au bout de leur conte, & qu'aujour-d'huy vous receuiez de tous costés des benedictions; si le peuple à desiré le changement de leur gouuernement, & qu'il crie d'vne cōmune voix, la continuation du vostre: vous deuez, M A D A M E, ou vous estimer en cela plus heureuse qu'eux, ou nous deuons vous estimer meilleure. Plus heureuse, en

la fidelité que vous receuez de vos subjects. Meilleure : en la protection que vos subjects reçoivent de vous. Il est vray, M A D A M E, nous ne trouuons point à dire nostre grand H E N R Y , & nous semble qu'il regne encore sous vn visage de femme : tellement que nous le deuons appeller Reyne en vous, ou vous appeller Roy : & dire qu'on ne vous a pas donné le gouuernement de l'Estat , mais plustost que vous luy auez esté donnée. La derniere de vos actions, M A D A M E, tesmoigne qu'elles ont esté toutes les autres. Pour conseruer la tranquillité publique , vous auez troublé vostre repos particulier. Vous aués mieux aymé contenter vos subjects , que les perdre ; leur donner ce qu'ils demandoient , que leur oster ce



qu'ils auoient eu : Suspendre vostre autorité pour auoir la paix, que la leur faire sentir en faisant la guerre, & estre appelée comme Liuia, mere de la patrie : que comme Fauſtina , mere des armées. Vous avez plus faiſt par la douceur que par la force. Et en cela, M A D A M E, le Roy & le peuple vous ſont obligez en pareil degré : le Roy, de luy auoir conſerué ſon peuple ; le peuple, de l'auoir conſerué à ſon Roy. Ce bon peuple, M A D A M E, contre toutes ſortes de charmes ſe tiendra ferme au gros de l'arbre de Saint Louïs. Quoy qu'il ſoit diuiſé de religion , il ne le ſera iamais d'obeiſſance : quoy qu'il n'aye pas la meſme Foy Romaine, il vous rendra touſiours la meſme Fidelité Françoïſe. Il ſe louë ſi fort des ef-

fects salutaires de vostre Regence, qu'il faut que vous croyez auoir autant de Rois, que de subjects : puis qu'ils sont plus heureux d'estre sous vous, qu'ils ne seroient grands d'estre sur les autres. Si quelque particulier remeuë, assurez-vous tousiours du general : Si quelque petit membre regimbe, croyez que c'est contre la volonté de son corps. Les pretextes ne seruent de rien pour desbaucher ceux qui se trouuent bien de leurs maistres. Les plus habilles Charlatans ne nous persuaderont iamais de voir ce que nous ne voyons pas. Les plus efrontez Empiriques ne nous feront iamais à croire que nous soyons malades sans auoir de mal. Esprits de trauers, qui ont la hardiesse d'accuser, celle qui a le pouuoir de les condamner : Qui,



pour monſtrer qu'il y a du deſordre en l'Eſtat, en ont faiſt tout exprés, afin qu'il y en euſt. S'il y en a, M A D A M E, on ne peut dire que vous l'ayez faiſt, car vous l'avez trouué. Ce ſont des indispoſitions particulieres, & quaſi domeſtiques des grands corps, qui neãtmoins n'alterent rien de leur embonpoint, & qui en cauſent de beaucoup plus grandes, ſi elles ſont eſmeuës, quoy que fort petites. Ce ſont deſordres à la verité, mais deſquels il ne ſe faut non plus plaindre, que des orages de l'air, des tempeſtes de la mer, & des tremblemens de la terre. Maux neceſſaires : & leſquels celui ſeul peut empêcher, qui les permet. Chose eſtrange, M A D A M E, qu'eſtans en plaine ſanté, nous nous pleignons d'une picqueure

au bout du doigt : que vous estans obligés de nostre guerison, nous nous fachions a vous de la douceur de vos remedes : qu'une poignée de gens veuille descrier vos actions , auxquelles la Chrestienté se sent redevable de son repos. Je dis la Chrestienté : qui paye d'ordinaire les frais de la diuision de ses Princes, & comme vne bonne famille , se dissipe par la mauuaise intelligence qui est entre les freres. Vous l'avez vnie, M A D A M E , par l'estroite alliance de ses deux plus illustres maisons : Vous avez ioinct par le ciment de la concorde, ses deux plus grands Royaumes. La France & l'Espagne , dis-je : qui sont les deux contraires à ce qu'on dict. Mais bon presage. Il naistra de leur conionction, comme du froid



& du chaud, le foudre qui tombera fatalement sur la puissante maison des Ottomans. Ainsi ,  
MADAME, si les Oracles sont veritables, vous ferez ceste femme de l'Apocalypse , qui foulerez la Lune aux pieds, & ferez descroistre le Croissant. En estendant le Royaume de Dieu, vous accroisterez le vostre : Autant que vous amenerez d'Infidelles à sa cognoissance , autant vous gagnerez de subiects au service du Roy vostre fils. Ainsi par les heureux effects de ce mariage , vous eterniserez vos enfans a la Couronne: comme par le bon ordre de vostre Regence , vous avez eternisé la Couronne à vos enfans. Tellement que la France , lors que vous serez au Ciel, moissonnera le repos que vous luy aurez

femé en terre : & vous estant obligée du principe , & de l'accroissement de son bonheur, elle vous le fera encore de sa durée : Beaucoup de choses, MADAME, en peu de mots. Car si nous nous souvenons du passé, c'est vous, qui avez apporté la paix en France, apres les miseres des guerres ciuiles: Si nous considerons le present, c'est vous qui nous la conseruez aujourd'huy en l'apprehension des mesmes miseres ; Et si nous iettons la veuë sur l'aduenir : c'est vous, MADAME, qui l'asseurez à nos neveux, contre ceste mesme apprehension. De sorte que tous les temps vous sont tributaires. Et nous n'auons vescu que par vous : nous ne viuons , & nous ne viurons que par vous.





